

# La'o Hamutuk

## Institutu Timor-Leste ba Monitor no Analiza Dezenvolvimentu

Rua dos Mártires da Patria, Bebora, Dili, Timor-Leste

Tel: +670 332 1040

email: [info@laohamutuk.org](mailto:info@laohamutuk.org)

Website: [www.laohamutuk.org](http://www.laohamutuk.org)



## Statement husi La'o Hamutuk ba Primeira Konferénsia kona ba Adaptasaun ba Alterasaun Klimátika

5 Novembru 2014

### "Hasoru fenómenu mudansa klimátika presiza asaun polítika forte liu duke projetu adaptasaun sira"

Iha loron 5-7 Novembru 2014, Sekretária Estada do Meu Ambiente (SEMA), Diresaun Nasionál ba Asuntu Ambientál Internasionál no Alterasaun Klimátika (DNAAIAC) hamutuk ho doador no NGO internasionál sira iha Grupu Servisu kona ba Adaptasaun ba Alterasaun Klimátika organiza primeira "Konferénsia kona ba Adaptasaun ba Alterasaun Klimátika" iha Dili. Eventu ne'e oportunidade ba NGO La'o Hamutuk atu fó hanoin ba Governu Timor-Leste, doador, ajénsia, NGO, akadémiku sira no sosiedade sivíl katak hasoru fenómenu mudansa klimátika, presiza asaun polítika forte atu rezolve abut husi problema ne'e no ezije nasaun no kompañia sira ne'ebé halo polusaun atu muda sira nia hahalok.

Tuir konkluziun husi sientífiku sira iha IPCC (Intergovernmental Panel on Climate Change), fenómenu mudansa klimátika akontese tanba atividade umanu ne'ebé provoca emisaun gas estufa maka'as ne'ebé hamanas iklima. Grupu ki'ik nasaun industrializadu no riku mak responsavel ba polusaun ne'e tanba fatór tuir mai: sira investe iha setór enerjia "fo'er" ne'ebé halo polusaun maka'as (petróleu, karbonu), sira nia sistema transporte envolve ve'ikulu barak, sira nia pratika agrikultura intensivu presiza enerjia no input kímika barak, sira nia setór indústriia halo polusaun maka'as, sira nia atividade komérsiu internasionál uza enerjia barak no halo polusaun boot. Problema maka nasaun sira ne'ebé vulneravel teb-tebes, hanesan nasaun ilha ki'ik sira iha Pasífiku, nasaun kiak sira iha Afrika, América Latina no Asia mos nasaun sira seluk tan ne'ebé sei simu impaktu maka'as husi mudansa klimátika.

La'o Hamutuk, hanesan grupu sosiedade sivíl barak iha mundu, defende konseitu "justisa klimátika" ne'ebé significa katak nasaun sira ne'ebé responsavel ba alterasaun klimátika mak tenke halo esforsu atu rezolve problema ne'ebé sira kria rasik. Sira nia suporta ba atividade adaptasaun iha nasaun vulneravel la'ós ajuda maibé ne'e sira nia devér duni (sira iha "deve istóriku") tanba sira mak provoca mudansa klimátika ne'e. No mós, sira labele uza sira nia suporta ba adaptasaun hanesan razaun atu kontinua sira nia emisaun. La'ós nasaun seluk atu "adapta", ka faan direitu atu nasaun seluk halo polusaun nafatin (carbon credit), maibé presiza mudansa profundo atu hatún emisaun.

Se ita analiza fenómenu mudansa klimátika kle'an liu, asuntu ne'e iha ligasaun ho sistema ekonomia global ne'ebé promove kapitalizmu, kreximentu ekonómiku permanente, over-produusaun, over-konsumsaun no over-esplorasau husi natureza.

Governu Timor-Leste tuir loloos presiza aprende husi realidade ne'e no adota modelu dezenvolvimentu ne'ebé sustentável duni, no planu adaptasaun tenke bazeia ba modelu ne'e. Ne'e significa iha vizaun tempu naruk, investe iha setór enerjia renovavel no konstrusaun ne'ebé uza enerjia menus, harii setór transporte públiku atu limita ve'ikulu privadu no kontrola kualidade ve'ikulu, limita importasaun no promove produsaun no konsumsaun ai-han lokál, kria

oportunidade servisu iha setór protesaun meiu ambiente no agrikultura sustentável, mantén balansu entre ita nia atividade no natureza.

Ikus liu, tenke kuidadu ho projetu sira ne'ebé maske iha intensaun di'ak hakarak ajuda, prevene comunidade atu dezenvolve sira nia kapasidade atu buka solusaun rasik. Klaru katak tempu iha eskala iklima no tempu adaptasaun umanu ba iklima kleur liu duke tempu projetu. Di'ak liu apoiu no luta hamutuk ho nasaun sira ne'ebé sai vítima husi mudansa klimátika atu ezije nasaun responsavel sira atu muda sira nia hahalok no modelu desenvolvimentu.

Ekipa Agrikultura La'o Hamutuk



Inês Martins



Alexandra Arnassalon



Mariano Ferreira